

Na osnovu člana 72. Zakona o izvršenju Budžeta Tuzlanskog kantona za 2025. godinu ("Službene novine Tuzlanskog kantona broj: 18/24) i člana 23. stav 1. alineja 5. Zakona o ministarstvima i drugim organima uprave Tuzlanskog kantona ("Službene novine Tuzlanskog kantona", broj: 10/18 - prečišćen tekst i 5/24), ministar finansija donosi

**UPUTSTVO**  
**O POSTUPKU REFUNDACIJE UPLAĆENIH SUDSKIH I ADMINISTRATIVNIH TAKSI**  
**ZA UPIS U NADLEŽNI REGISTAR I TROŠKOVA NA IME NABAVKE FISKALNOG**  
**UREĐAJA**

**I. OPĆE ODREDBE**

**Član 1.**

(1) Ovim Uputstvom propisuje se postupak refundacije uplaćenih sudskih taksi za upis novoosnovanih poslovnih subjekata u Registarском odjeljenju Općinskog suda u Tuzli i administrativnih taksi za upis novoosnovanog osnovnog, dodatnog i dopunskog zanimanja u nadležni gradski ili općinski obrtni registar, upisnik putničkih agencija, upisnik turističkih vodiča, upisnik odobrenja za pružanje ostalih turističkih usluga fizičkih osoba, registar trgovačkih radnji, registar ugostiteljskih radnji, te registar izdatih odobrenja za obavljanje privatne prakse zdravstvenih radnika i zdravstvenih saradnika kod Ministarstva zdravstva Tuzlanskog kantona u 2025. godini.

(2) Ovim Uputstvom propisuje se postupak refundacije troškova na ime nabavke fiskalnog uređaja u cilju fiskalizacije u 2025. godini za poslovne subjekte iz stava 1. ovog člana.

**Član 2.**

(1) Pod sudskim taksama u smislu ovog Uputstva podrazumijevaju se sudske takse utvrđene Zakonom o sudskim taksama - prečišćen tekst ("Službene novine Tuzlanskog kantona", br. 4/16 i 10/18) - Tarifa sudskih taksi - vrsta prihoda-722221, i to:

1. Tarifni broj 19. (takse za podneske)

a) Za prijavu u sudski registar novoosnovanih poslovnih subjekata

2. Tarifni broj 20. (taksa za upise u sudski registar)

a) Za rješenje o upisu osnivanja privrednog društva,

b) Za rješenje o upisu osnivanja dijelova privrednog društva,

c) Za rješenje o upisu osnivanja drugih pravnih osoba koje nisu navedene pod tačkama a) i b),

d) Za rješenje o upisu osobe ovlaštene za zastupanje novoosnovane pravne osobe,

e) Za rješenje o upisu prava vršenja spoljnotrgovinskog prometa novoosnovanih poslovnih subjekata,

f) Za rješenje o upisima koji nisu obuhvaćeni prethodnim tačkama.

(2) Pod sudskim taksama u smislu ovog Uputstva podrazumijevaju se i uplate izvršene u svrhu objavljivanja oglasa u Službenim novinama Federacije Bosne i Hercegovine za potrebe upisa osnivanja privrednog društva i/ili upisa prava obavljanja vanjskotrgovinskog poslovanja novoosnovanih poslovnih subjekata.

**Član 3.**

Pod administrativnim taksama u smislu ovog Uputstva podrazumijevaju se administrativne takse na ime izdavanja rješenja o odobrenju za rad utvrđene Zakonom o kantonalnim administrativnim taksama - prečišćen tekst ("Službene novine Tuzlanskog kantona", br. 6/12, 15/13 i 10/18) - Tarifa kantonalnih administrativnih taksi -kantonalne

administrativne takse - vrsta prihoda - 722121 i općinske administrativne takse u skladu sa propisima jedinica lokalne samouprave uplaćene na ime izdavanja odobrenja za rad - vrsta prihoda - 722131, 722135 i 722449.

#### Član 4.

Pravo na refundaciju uplaćenih sudskih i administrativnih taksi iz člana 1. ovog Uputstva iz sredstava Budžeta Tuzlanskog kantona imaju uplatitelji istih pod uslovom da jedinice lokalne samouprave na području Tuzlanskog kantona u čiji nadležni općinski ili gradski obrtni registar, upisnik putničkih agencija, upisnik turističkih vodiča, upisnik odobrenja za pružanje ostalih turističkih usluga fizičkih osoba, registar trgovačkih radnji, registar ugostiteljskih radnji se vrši upis, ne vrše refundaciju uplaćenih taksi ili ne provode postupak oslobođenja istih.

## II. UTVRĐIVANJE PRAVA NA REFUNDACIJU SUDSKIH TAKSI, ADMINISTRATIVNIH TAKSI I NOVČANIH SREDSTAVA NA IME NABAVKE FISKALNOG UREĐAJA

#### Član 5.

(1) Pod uplaćenim sudskim i administrativnim taksama, u smislu ovog Uputstva, podrazumijeva se uplata koja je evidentirana na Jedinstvenom računu trezora Tuzlanskog kantona (JRT) ili računu jedinice lokalne samouprave Tuzlanskog kantona u ovisnosti od pripadnosti takse, na način propisan važećim Pravilnikom o načinu uplate, pripadnosti i raspodjele javnih prihoda u Federaciji Bosne i Hercegovine i drugim važećim zakonskim propisima i aktima kojima se regulira način uplate sudskih i administrativnih taksi.

(2) Pod uplatiteljem, u smislu ovog Uputstva, podrazumijeva se pravno ili fizičko lice koje je izvršilo uplatu sudske ili administrativne takse na JRT ili račun jedinice lokalne samouprave ili poslovni subjekt iz člana 1. Uputstva koji je izvršio uplatu novčanih sredstava na ime nabavke fiskalnog uređaja ovlaštenom distributeru.

#### Član 6.

Pod fiskalnim uređajem se podrazumijeva fiskalna kasa/štampanje ili drugi uređaj za registrovanje prometa dobara i usluga unesenih u njenu bazu podataka o dobrima i uslugama koji se na propisani način saopštavaju kupcu dobara, odnosno korisniku usluga (klijentu) uz istovremeno evidentiranje na kontrolnoj traci ili drugom mediju fiskalne kase ili drugom fiskalnom uređaju, njihovo periodično evidentiranje u fiskalnoj memoriji fiskalne kase/štampanja ili drugog fiskalnog uređaja kao i formiranje odštampanih fiskalnih dokumenata.

#### Član 7.

(1) Pravo na refundaciju uplaćenih novčanih sredstava na ime nabavke fiskalnog uređaja imaju poslovni subjekti iz člana 1. ovog Uputstva koji u toku 2025. godine kumulativno ispune sljedeće uslove:

1. osnuju poslovni subjekt prvi put i
2. prvi puta provode postupak fiskalizacije za poslovni subjekat iz tačke 1.

(2) Refundacija novčanih sredstava na ime nabavke fiskalnog uređaja vrši se jednokratno.

(3) Pod uplaćenim novčanim sredstvima na ime nabavke fiskalnog uređaja podrazumijevaju se uplate izvršene isključivo bezgotovinskim načinom plaćanja od strane poslovnog subjekta koji je osnovan u toku 2025. godine ovlaštenom proizvođaču/zastupniku ili

ovlaštenom distributeru na ime nabavke fiskalnog uređaja, a u skladu sa Zakonom o fiskalnim sistemima ("Službene novine F BiH" broj: 81/09).

(4) Pod uplaćenim novčanim sredstvima na ime nabavke fiskalnog uređaja ne podrazumijevaju se uplate izvršene gotovinskim plaćanjem i iste ne podliježu odobravanju prava na refundaciju novčanih sredstava na ime nabavke fiskalnog uređaja.

#### **Član 8.**

Poslovni subjekti iz člana 1. ovog Uputstva mogu ostvariti pravo na refundaciju novčanih sredstava na ime nabavke fiskalnog uređaja u maksimalnom iznosu do 800,00 KM sa uključenim PDV-om.

#### **Član 9.**

Pravo na refundaciju uplaćenih sudskih taksi za upis poslovnih subjekata u Regstarskom odjeljenju Općinskog suda u Tuzli i administrativnih taksi za upis u nadležni registar iz člana 1. stav 1. ovog Uputstva kao i novčanih sredstava na ime nabavke fiskalnog uređaja može biti odobreno istom osnivaču više poslovnih subjekata ili vlasnika obrta samo za 1 (jedan) novoosnovan poslovni subjekt ili obrt u toku tekuće fiskalne godine.

#### **Član 10.**

(1) Postupak refundacije uplaćene sudske ili administrativne takse ili uplate na ime nabavke fiskalnog uređaja pokreće se na temelju pisanog zahtjeva uplatitelja.

(2) Zahtjev za refundaciju podnosi se Ministarstvu finansija Tuzlanskog kantona (u daljem tekstu: Ministarstvo) putem protokola Ureda za zajedničke poslove kantonalnih organa.

(3) Zahtjev za refundaciju obavezno sadrži osnovne podatke podnosioca zahtjeva – uplatitelja sudske ili administrativne takse ili novčanih sredstava na ime nabavke fiskalnog uređaja i to: prezime, ime, adresa, JMBG i kontakt telefon za fizička lica, odnosno naziv i sjedište firme, ID broj i kontakt telefon za pravna lica.

#### **Član 11.**

(1) Uz zahtjev iz člana 10. ovog Uputstva za refundaciju uplaćenih sudskih taksi i/ili administrativnih taksi prilaže se:

- dokaz o upisu poslovnog subjekta u Regstarskom odjeljenju Općinskog suda u Tuzli ili upisu u nadležni registar iz člana 1. stav 1. ovog Uputstva u 2025. godini – original ili ovjerena kopija
- Uvjerenje o poreskoj registraciji – original ili ovjerena kopija
- dokaz o izvršenoj uplati sa jasno naznačenim podacima o uplatitelju novčanih sredstava, svrhom uplate i vrstom prihoda i šifre općine (nalog za uplatu ili ovjerena kopija naloga za uplatu, izvod sa žiro računa uplatioca i drugi dokazi na temelju kojih se mogu utvrditi podaci i svrha uplate) – original ili ovjerena kopija
- izjava, ovjerena kod nadležnog organa (notar ili nadležna gradska/općinska služba), uplatioca sudskih taksi ili administrativnih taksi iz člana 2. i 3. Uputstva da nije ostvario pravo na oslobođenje od plaćanja sudskih ili administrativnih taksi ili refundaciju uplaćenih taksi od strane jedinica lokalne samouprave na području Tuzlanskog kantona u toku tekuće fiskalne godine
- fotokopija važeće lične karte i
- fotokopija broja računa uplatioca sudskih taksi i/ili administrativnih taksi
- eventualno ostali dokazi o izvršenim uplatama.

(2) Uz zahtjev iz člana 10. ovog Uputstva za refundaciju novčanih sredstava na ime nabavke fiskalnog uređaja prilaže se:

- dokaz o upisu poslovnog subjekta u Registarском odjeljenju Općinskog suda u Tuzli ili upisu u nadležni registar iz člana 1. stav 1. ovog Uputstva u 2025. godini – original ili ovjerena kopija
- Uvjerenje o poreskoj registraciji – original ili ovjerena kopija
- Rješenje o fiskalizaciji fiskalnog sistema u 2025. godini – original ili ovjerena kopija
- dokaz o izvršenoj uplati novčanih sredstava na ime nabavke fiskalnog uređaja i to kumulativno sljedeći dokazi: predračun/profaktura, fiskalni račun, faktura, izvod sa žiro računa novoosnovanog poslovnog subjekta na ime nabavke fiskalnog uređaja, ovjeren cjenovnik ovlaštenog distributera – original ili ovjerena kopija
- Ugovor o kupoprodaji fiskalnog uređaja/sistema – original ili ovjerena kopija
- fotokopija broja žiro računa novoosnovanog poslovnog subjekta
- izjava, ovjerena kod nadležnog organa (notar ili nadležna gradska/općinska služba), osnivača novoosnovanog poslovnog subjekta odnosno vlasnika obrta da prvi puta podnosi zahtjev za refundaciju novčanih sredstava na ime nabavke fiskalnog uređaja u toku tekuće fiskalne godine i da nije ostvario pravo na refundaciju novčanih sredstava iz člana 1. Uputstva o postupku refundacije uplaćenih sudskih i administrativnih taksi za upis u nadležni registar i troškova na ime nabavke fiskalnog uređaja u toku tekuće fiskalne godine
- eventualno ostali dokazi o izvršenim uplatama.

#### **Član 12.**

(1) Nepotpun, neuredan ili neblagovremen zahtjev za refundaciju uplaćenih sudskih taksi i/ili administrativnih taksi iz člana 2. i 3. ovog Uputstva, Ministarstvo će odbiti rješenjem.

(2) Nepotpun, neuredan ili neblagovremen zahtjev za refundaciju novčanih sredstava na ime nabavke fiskalnog uređaja, Ministarstvo će odbiti rješenjem.

### **III. ODOBRAVANJE REFUNDACIJE SUDSKIH TAKSI, ADMINISTRATIVNIH TAKSI I NOVČANIH SREDSTAVA NA IME NABAVKE FISKALNOG UREĐAJA**

#### **Član 13.**

(1) Ministarstvo, na temelju dokumentacije priložene uz zahtjev podnosioca zahtjeva, donosi rješenje o utvrđivanju prava na refundaciju uplaćene sudske takse, administrativne takse ili uplaćenih novčanih sredstava na ime nabavke fiskalnog uređaja.

(2) Kada to ocijeni potrebnim, Ministarstvo može od podnositelja zahtjeva koji je dostavio svu traženu dokumentaciju ili nadležnog organa zatražiti da dostavi dodatne dokaze ili drugu dokumentaciju potrebnu za rješavanje podnesenog zahtjeva.

(3) Zahtjev za refundaciju uplaćene sudske takse, administrativne takse ili novčanih sredstava na ime nabavke fiskalnog uređaja uplaćenih u 2025. godini može se podnijeti najkasnije do 31.12.2025. godine.

(4) Dispozitiv rješenja iz stava 1. ovog člana obvezno sadrži:

- prezime i ime i adresu za fizička lica, odnosno naziv i sjedište pravnog lica - uplatitelja sredstava
- identifikacijski broj podnositelja zahtjeva za pravna lica ili jedinstveni matični broj građanina
- visinu utvrđenog iznosa za refundaciju uplaćene sudske takse, administrativne takse ili visinu utvrđenog iznosa za refundaciju novčanih sredstava na ime nabavke fiskalnog uređaja;
- šifru prihoda i općine za refundaciju uplaćene sudske takse i/ili administrativne takse;
- datum uplate sudske takse, administrativne takse ili datum uplate novčanih sredstava na ime nabavke fiskalnog uređaja;

- broj žiro-računa i naziv banke kod koje je otvoren za uplatitelja sredstava – fizičkog ili pravnog lica.

#### **Član 14.**

(1) Refundacija uplaćene sudske takse, administrativne takse ili uplaćenih novčanih sredstava na ime nabavke fiskalnog uređaja izvršava se potpunom naloga za prenos sredstava, potpisanim od strane ovlaštenih lica, a na račun pravnog ili fizičkog lica.

(2) Nalog za prenos popunjava se na način propisan važećim Pravilnikom o načinu uplate javnih prihoda budžeta i vanbudžetskih fondova na teritoriji Federacije Bosne i Hercegovine.

(3) Nalozi za refundaciju mogu se ispostavljati djelimično u skladu sa tekućim prilivom na JRT.

#### **IV. PRIJELAZNE I ZAVRŠNE ODREDBE**

#### **Član 15.**

(1) Izuzetno od odredbi člana 13. stav 3. ovog Uputstva, za poslovne subjekte iz člana 1. ovog Uputstva koji izvrše upis u Registarskom odjeljenju Općinskog suda u Tuzli ili u nadležni registar u periodu od 15.12.2025.-31.12.2025. godine pravo na podnošenje zahtjeva za refundaciju uplaćenih sudskih i administrativnih taksi kao i novčanih sredstava na ime nabavke fiskalnog uređaja ističe 31.01.2026. godine.

(2) Refundacija novčanih sredstava iz stava 1. ovog člana će biti izvršena na teret budžeta Tuzlanskog kantona za 2026. godinu.

#### **Član 16.**

Protiv rješenja Ministarstva iz člana 12. i člana 13. ovog Uputstva, podnosilac zahtjeva može izjaviti žalbu Komisiji za drugostepeno rješavanje Vlade Tuzlanskog kantona.

#### **Član 17.**

(1) Ovo Uputstvo se primjenjuje za 2025. godinu, osim u slučaju izmjene, dopune ili donošenja novog propisa o fiskalizaciji u toku 2025. godine, a koji utiče na nabavku fiskalnih uređaja.

(2) U slučaju iz stava 1. ovog člana, primjena dijela Uputstva koji se odnosi na refundaciju troškova na ime nabavke fiskalnog uređaja prestaje da važi od dana stupanja na snagu propisa iz stava 1. ovog člana.


(3) Zahtjevi za refundaciju novčanih sredstava na ime nabavke fiskalnog uređaja podnijeti prije stupanja na snagu propisa iz stava 1. ovog člana, završiti će se po odredbama ovog Uputstva.

#### **Član 18.**

Ovo Uputstvo stupa na snagu danom donošenja i objavit će se u "Službenim novinama Tuzlanskog kantona".

MINISTARSTVO FINANSIJA

Broj: 07/1- 11- 8671 | 25  
Tuzla, 26.03.2025. godine



MINISTAR  
Suad Mustajbašić, dipl. ecc

[www.trio.ba](http://www.trio.ba)